



Inatsisartunut ilaasortaq Niels Thomsen, Demokraatit

**§ 37 tunngavigalugu apeqquteqaammut nr. 177, 2011-imut akissuteqaat:
Demokraatit 2012-miit 16-mut arnat pinngitsaalineqarsimasut allatigullu
kinguaassiuutitigut atornerlunneqarsimasut suliniarfigineqarnissaannut
kaammattuuteqarnerat Naalakkersuisut tapersersorusuppaat?**

Asasara Niels Thomsen

Arnat kinguaassiuutitigut pinngitsaalineqarsimasut suliniarfigineqarnissaat tamatumalu tungaatigut siunissaq ungasinnerusoq isigalugu pinaveersaartitsinissaq kiisalu tarnikkut atukkatigullu naammattumik ikiorneqarnissamik neqerooruteqarneq pillugu apeqquteqaatinnut qujanaq.

Arnat kinguaassiuutitigut pinngitsaalineqarsimasut taama amerlatiginerat aammattaaq Naalakkersuisut ilittulli ernumanartutut isigaat, tamatumalu tungaatigut suliniuteqarnissamik pisariaqartitsisoqarpoq. Taamaattumillu siunissaq ungasinnerusoq eqqarsaatigalugu kinguaassiuutitigut kanngutsaatsuliortarnerit suugaluartulluunniit akiorneqarnissaat eqqarsaatigalugit immikkoortut tamat akimorlugit suliaqarnissamik periusissanik suliniuteqarnissaq ersarissumik siunnerneqarpoq. Siunissaq ungasinnerusoq isigalugu suliniutit Naalakkersuisunit pingaartinneqarpoq, pingaartumillu meeqqanut inuusuttunullu tunngatillugu suliniutigisat tassaassapput kinguaassiuutitigut kanngutsaatsuliornernik akiuiniarnermi tunngavigineqartussat.

Imminut nammassinnaasumik suliniuteqarnermi arnat kinguaassiuutitigut pinngitsaalineqartarnerat imigassamik atornerluinermik akiuiniarnermut, sumiginnaanermik nakuusernermillu akiuiniarnermik suliniuteqarnitsinnut ilanngutissallugu pisariaqartutut isigaarput. Suliniuteqarnissarlu siunissami ungasinnerusumi sunniuteqassappat, isumaginninnermi peqqinnissaqarnermilu suliniuteqarnerit ataqatigiittariaqarput. Ajornartorsiutit iluarsiivigiinarnerini taakkua qitiusumik inissisimapput, taakkualu killeqartumik ilisimasatigut aningaasatigullu periarfissaqarput; taamaattumillu akiuiniarneq pitsaanerpaamik angusaqarfigissagaanni suleqatigiinnissap aaqqissuussaasup pilersinneqarnissaa toqqammavigineqartariaqarpoq.

Naalakkersuisut isumaqarput, pitsaanerpaamik sunniuteqarfiusumillu angusaqartoqassappat meeqqanut inuusuttunullu tunngatillugu suliniutitta ingerlaavartumik ineriartortinnissaat qulakkeerneqartariaqartoq. Iliuusissamik suliaqarnitsinni sapinngisamik piaartumik qanoq iliuseqartarnerup annertunerpaamik angusaqarfiusarnera takussutissaqareerpoq. Kiisalu meeqqanut inuusuttunullu tunngatillugu suliniuteqarnerup aallaavigineqarnera tunngavissaqarluarpoq, tassami meeqqat inuusuttullu tassaammata pinerluummik annertunerpaamik eqqorneqartartut,

27. sep 2011
Sagsnr. 2011-055479
Dok. Nr. 728308

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: ikinn@nanoq.gl
www.nanoq.gl

taakkualu tassaallutik nammineerlutik ikiorneqarnissamik ujartuinissamut nammineerlutik periarfissaqanngitsut.

Taamaakkaluartorli eqqugaasut angajoqqaavinut ikiorsiinissaq tamatigut pisariaqartuusarmat, tassa taakkua aammattaaq meeqqaminnik ikiorsiissappata. Angajoqqaajusut piginnaasaqarnermik amigaateqarnermi/akisussaanermillu tigumiarnissamut amigaateqaraanni, tamatumunnga ilanngullugu meeqqap pisariaqartitsinerata nammineq pisariaqartitsinermit siulliullugu inissinnissamut piginnaasaqarneq amigaatigigaanni, inuttut atukkatigut ajornartorsiutit milliseqqaarnissaat pingaernerusariaqarpoq. Tassami meeqqat angajoqqaatut inuiaqatigiinni inooqataasussanngorlugit perorsarniaraanni pisinnaatitaaffinnik pisussaaffinnillu ingerlatsinissaq ilaatinneqartuartariaqarmat, kiisalu arnat angutillu naligiinnerat nalilittut toqqammavigineqartariaqarluni. Taamaattumillu ilaqutariinnut naligiinnermullu suliniutit nakuusernermik pinngitsaaliinermillu akiuiniarnermik suliaqarnermi qitiulluinnartumik ilaatinneqassasut Naalackersuisut isigaat.

Nakuusernermut tunngatillugu angerlarsimaffinni nakuusernermik annertuumik akiuiniarnermik periusissanik suliniutissanillu annertuunik suliaqarnissaq Naalackersuisut unammilligassatut annertuutut isigaat. Nakuusernermimi taamaallaat anaanamut eqqugaasumut (imaluunniit ataatumut) ajoqutaasumik tunneq ajorpoq, nakuuserneq meeqqamik annertooujussuarmik ajoqusiisarpoq, tassa nakuusernermik isiginnittumik – soorunalumi meeqqamut namminerlut nakuuserneq annertuumik ajoqutaasarpoq. Ilisimatusarnerit nutaat takutippaat nakuuserneq meeqqamut ima ajoqutaatigisartuq kinguaassiuutitigut kanngutsaatsuliornermiit allaat meeraq inersimasunngormermini annertunerusumik ajoquserneqartarluni aammalu nammineq pinerliisunngortarluni, tamatumunngalu ilanngullugu kinguaassiuutitigut pinerliisunngorsinnaalluni. Tamatumunnga atatillugu nakuusernerup akiorniarneqarnera pingaartissallugu pissusissamisoorpoq, pingaarutilittullu ilannguttariaqarpoq, nakuusernermik akiuiniarneq aammattaaq tassaammat kinguaassiuutitigut pinerliinernik akiuiniarneq.

Arnanik kinguaassiuutitigut pinngitsaalineqarnermik nalaataqarsimasumik ikiuinissamik pisussaaffeqarnerput Naalackersuisunit isumaqatigaarput. Tamatumunngalu atatillugu ilaatigut qimarnguiit qanoq inissisimassanersut suliaqassanersullu nalilersortariaqarpavut; pisinnaasaasigut annertusaavigineqartariaqarnersut kiisalu nakuuserfigineqarsimasunik kinguaassiuutitigullu pinerliivigineqarsimasut amerlaqisumik suliaqarnerminnut atatillugu ilinniarsimasatigut piginnaasatigut qaffassaavigineqartariaqarnersut, matumanilu aammattaaq angutit ilaatinneqarput. Ullumikkut Nunatsinni 7-inik qimarngueqarpoq, taakkualu sullissineri assigiinngiiaarput, arnanik nakuuserfigineqarsimasut (taakkualu qitornaanik) paaqqutarinnittarlutik. Ilisimaneqarpoq qimarnguiit 7-iusut pingaartumik soqutiginninneq tunngavigalugu akissarsiaqanngitsunik sulisoqartartut, taamaattumillu ullumikkut suliassatut tigumiatsinnik, tassa kommunit siunnersuinermik suliarinninnermillu suliaqarnissamut piareersimanatik, piginnaasatigut annertussutsikkullu amigarlutik.

Naalackersuisut 2010-mi 2011-imilu qimarnguinni sulisunik pikkorissaanermik ingerlatsinikuupput, kiisalu Nunatta Karsiata Qimarnguiit Kattuffiata qimarnguinnik ineriartortitsinermik suliaqarnera tapiiffigisarpaa. Taakkua saniatigut Nunatta Karsiata Ilinniartunut siunnersuisarfik tapiiffigisarpaa, tasanilu siunnersuisarneq suliarineqarnerlu pissarsiarineqarsinnaavoq, kiisalu Kriminalforsorgip ataani

inissisimasumik pinerliisartut katsorsarneqarnerat sulisut tamatumunnga sulisussat atorlugit ingerlallugu.

Naalackersuisut nuna tamakkerlugu nakuusernermik akiuniarnermi periusissanik suliaqarnissaq eqqarsaatigaa, tamatumunngalu atatillugu kommuninit tamakkua tungaatigut qanoq piareersimasoqartiginersoq assigisaanillu ersarissumik paasisaqarnissaq pingaaruteqarpoq, tamakkualu tunngavigalugit piviusunngortitsinissaq, kiisalu kommunit ataasiakkaat qanoq annertutigisumik suli annertunerusumik pinaveersaartitsinikkut tapersersuinikkullu piviusunngortitsisinnaanissaat paasissallugit pingaaruteqarpoq. Kiisalu aammattaaq apeqqutaalluinnarpoq kommunit, politiit peqqinnissaqarfiillu suleqatigiinnerisa ataqatigiissaarnissaannik qulakkeerinninnissamik suliaqarnerput ingerlatiinnassavarput, tassami pineqartut suleqatigiinnissaat pisariaqarluinnarmat, kiisalu pingaartumik sulisutigut aningaasatigullu periarfissaqarnissaq amigartutut inissisimanerini.

Arnat kinguaassiuutitigut kanngutsaatsuliorfigineqarsimasunik sammisaqarnermut atatillugu kinguaassiuutitigut kanngutsaatsuliornerup akuersaarneqarsinnaannginnera inatsisinillu unioqqutitsinertut isigineqarnerata ersarissuunnissaa Naalackersuisunit isumaqatigineqarpoq. Kiisalu attuumassuteqartut, tamatumunnga ilaatillugit Det Kriminalpræventive Råd kiisali Nunatsinni Naligiissitaanermi Siunnersuisoqatigiit kaamattorneqassapput suliniuteqarnerminni pinngitsaaliinerit akiorneqarneri pingaaruteqartutut inisseqqullugit. 2011-imi Naalackersuisut nutaanik naligiissitaanermi siunnersuisoqatigiinnik toqqaasussaapput, siunniunneqarporlu naligiissitaanermi siunnersuisoqatigiit uummaarissut katiterniarlugit matumanilu arnanut isiginnittarnerup ilaatinnissaa tassa nakuusernernut kinguaassiuutitigullu pinngitsaaliisarnermut tunngatillugu oqallinneq suliniarnerlu pingaartutut inissillugit. Aammattaaq Naalackersuisut isumaqatigaat politikikkut ersarissuutissallugu inatsisiliornikkut suliniutigisat sukateriffigissallugit sutigullu suliniuteqarnissaq misissussallugu.

Naalackersuisulli pingaarnertullugu aalajangiuppaat ataatsimoortumik meeqqanut inuusuttunullu taamatullu ilaqutaasa inuuniarnikkut atugaannut tunngatillugu ineriartornissaannullu tunngatillugu suliniuteqarnissat siunissamut ungasinnerusumut sammisinnerqartut ataatsimullu isigisut aalajangiusimavaat nakkutiginiarlugillu,

Inussiarnersumik inuulluaqqusillunga

Mimi Karlsen